



REPUBLIKA E KOSOVËS / REPUBLIKA KOSOVA

GJYKATA THEMELORE GJAKOVË

Numri i lëndës: 2024:073886  
Datë: 29.03.2024  
Numri i dokumentit: 05527977

NË EMËR TË POPULLIT

GJYKATA THEMELORE NË GJAKOVË – Departamenti i Përgjithshëm – Divizioni Penal, gjyqtari Driton Sadiku, me sekretaren juridike Mandushe Doli, në lëndën penale ndaj të pandehurit F.B., nga Prizreni, për shkak të veprës penale ngacmimi nga neni 182 par.1 të Kodit Penal të Republikës së Kosovës (në vazhdim KPRK-së), i akuzuar nga Prokuroria Themelore në Gjakovë – Departamenti i Përgjithshëm sipas aktakuzës me numër PP/II.nr.936/2023 të datës 01.03.2024, duke vendosur lidhur me propozimin e prokurorisë për dhënien e urdhrin ndëshkimor, jashtë shqyrtimit gjyqësor, me datën 29.03.2024, mori këtë:

A K T G J Y K I M

PRANOHET kërkesa e Prokurorisë Themelore në Gjakovë - Departamenti Përgjithshëm, për dhënien e urdhrin ndëshkimor PP/II.nr.936/2023 e datës 01.03.2024, gjykata ne kuptim të nenit 495 të Kodit të Procedurës Penale (në vazhdim KPP-së), jep këtë:

URDHËR NDËSHKIMOR

I pandehuri:

F.B., nga i ati ... e ëma ...e vajzërisë ..., i lindur me datën ..., në Prizren, ku dhe banon në fshatin ..., Komuna e Prizrenit, ka të kryer shkollën e mesme, beqar, i gjendjes së dobët ekonomike, punëtor, shqiptar, shtetas i Republikës së Kosovës, me numër personal ....

ESH T Ë F A J T O R

Sepse me datën 16.06.2023, rreth orës 08:51 minuta, e deri me datë 17.06.2023, i pandehuri me dashje përfshihet në një sjellje të vazhdueshme dhe të padëshirueshëm ose komunikon me qëllim të ngacmimit këtu të dëmtuarën L.Z., me përsëritjen e thirrjeve dhe dërgimin e mesazheve telefonike, në atë mënyrë që deri sa e dëmtuara ishte në fshatin ..., K-Gjakovë i pandehuri përmes rrjeteve sociale “Viber” me prefiks gjerman .... me datë 16.06.2023 i shkruan mesazh të dëmtuarës. “ *Hoi, qysh je qysh po kalon*” ashtu që pasi e dëmtuara nuk i përgjigjet mesazhit i njëjti të nesërmen me datë 17.06.2023 përsëri e telefonon të dëmtuarën, dhe pasi që e dëmtuara nuk i përgjigjet, i shkruan mesazh bashkëshortit të dëmtuarës V... “ *Qitma ta q., grun dhe fmin, unë gruan ta njoh shumë mirë, kurvën tone nuk e marr veç e kam pas me i shfry b., kur t kam nevojë në pushim.* “

- Me këto veprime ka kryer veprën penale ngacmimi nga neni 182 par.1 të KPRK-së.

Andaj gjykata në kuptim të nenit 4, 38, 40 par.1 pika 1.3, 43, 69, 70 dhe 182 par.1 të KPRK-së, si dhe neni 364 të KPP-së, të pandehurit i;

## SH Q I P T O N

- I. DËNIM ME GJOBË në shumë prej treqind (300.00) euro, të cilin dënim i pandehuri është i obliguar që ta paguaj në afat prej pesëmbëdhjetë (15) ditëve nga dita e plotfuqishmërisë së këtij aktgjykimi.
- II. Nëse i pandehuri nuk dëshiron ose nuk mund ta paguaj dënimin me gjobë, atëherë të pandehurit dënimi me gjobë i zëvendësohet me dënim me burgim në kohëzgjatje prej pesëmbëdhjetë (15) ditëve, ashtu që për çdo ditë të kaluar në burgim do të llogaritet nga njëzet (20.00) euro.
- III. E dëmtuara L.Z., nga fshati ... Komuna Gjakovë për realizimin e kërkesës pasurore juridike udhëzohet në kontest të rregullt juridiko - civil.
- IV. Detyrohet i pandehuri që t'i paguaj shpenzimet e paushallit gjyqësor në shumën prej njëzet (20.00) euro, si dhe shpenzimet për programin për kompensimin e viktimave të krimit shumën prej njëzet (20.00) euro, të gjitha këto në afat prej pesëmbëdhjetë (15) ditëve nga dita e plotfuqishmërisë së këtij aktgjykimi.

## A r s y e t i m

Prokuroria Themelore në Gjakovë–Departamenti Përgjithshëm, në këtë gjykatë ka parashtruar aktakuzën me numër PP/II.nr. 936/2023, të datës 01.03.2024, ndaj të pandehurit F.B., për shkak të veprës penale ngacmimi nga neni 182 par.1 të KPRK-së, me kërkesë për dhënien e urdhrin ndëshkimorë, duke i propozuar gjykatës që të pranoi kërkesën për dhënien e urdhrin ndëshkimor dhe të merr aktgjykim pa e mbajtur seancën e shqyrtimit kryesor, dhe të pandehurit t’i shqiptoj dënimin me gjobë, me arsyetim se ka prova të mjaftueshme se i pandehuri e ka kryer veprën penale e cila i vihet në barrë.

Pas shikimit të shkresave të lëndës dhe provave që gjinden në shkresat e lëndës, gjyqtari i vetëm gjykues gjeti se janë plotësuar kushtet ligjore nga neni 493 par.1 të KPP-së dhe në kuptim të nenit 495 par.1 të KPP-së vendosi që ta pranojë kërkesën për dhënien e urdhrin ndëshkimor.

Gjykata konsideron se provat e bashkangjitura në shkresat e lëndës si: raporti i oficerit B.M., me numër punues KPS#11511, datë 18.06.2023; deklarata e të dëmtuarës L.Z., dhënë në stacionin policor me datën 18.06.2023; deklarata e të pandehurit F.B., e dhënë në Stacionin Policor me datën 01.07.2023; deklarata e dëshmitarit V.H., dhënë në stacionin Policor me date 28.06.2023; CD; foto dokumentacioni – Screenshot e bisedave, si dhe shkresat tjera të lëndës, janë prova të besueshme mbi bazën e të cilës vërtetohet se i pandehuri e ka kryer veprën penale për të cilën është akuzuar.

Gjykata këtë dënim e ka shqiptuar me bindje se me të njëjtin do të arrihet qëllimi i dënimit në vështrim të nenit 38 të KPP-së, që të parandaloj kryerësin nga kryerja e veprës penale në të ardhmen dhe të bëjë rehabilitimin e tij, që në të ardhmen i pandehuri të ketë kujdes të shtuar që të mos bie në kundërshtim me ligjin, pasi që gjykata mundet të ashpërsoj dënimin kundër tij, po ashtu të parandaloj personat tjerë nga kryerja e veprave penale si dhe me këtë dënim të shprehë gjykimin shoqëror për veprën penale të kryer dhe të ngritë moralin dhe forcimin e detyrimit për respektimin e ligjit.

Vendimi për udhëzimin e palës së dëmtuar në kontest civil për realizimin e kërkesës pasurore juridike është marrë duke u bazuar në nenin 462 par.2 të KPP-së.

Vendimi mbi shpenzimet e paushallit gjyqësor është marrë në bazë nenit 450 par.1 dhe 2 nënpar.2.6 lidhur me nenin 452 par.1 të KPP-së, ndërsa për programin për kompensimin e viktimave të krimit në bazë të nenit 36 par. 3 nënpar.3.1 të Ligjit për kompensimin e viktimave të krimit.

Nga sa u tha më lartë u vendos si në dispozitiv të këtij aktgjykimi.

GJYKATA THEMELORE NË GJAKOVË  
Departamenti i Përgjithshëm – Divizioni Penal  
2024:073886, më datën 29.03.2024

Sekretarja juridike  
Mandushe Doli

Gjyqtari i vetëm gjykues,  
Driton Sadiku

**KËSHILLË JURIDIKE:**

Kundër këtij aktgjykimi i pandehuri mund të ushtroj kundërshtim në afat prej tetë (8) ditësh nga dita e pranimit të tij, kundërshtimi paraqitet në këtë gjykatë. Nëse nuk ushtrohet kundërshtim brenda afatit të përcaktuar, aktgjykimi do të merr formë të prerë dhe ekzekutohet dënimi i shqiptuar.

Numri i lëndës: 2024:073886  
Datë: 29.03.2024  
Numri i dokumentit: 05527977